

羅田縣志卷之七

災異志

災異也志之何敬天戒也嗟乎天人之理微矣然庶徵衍於箕疇而感應之神昭乎不可誣者變之來也其可獨委於天乎是故聽一邑之政則召祥弭災者令之職也志災異

災異

○按自春秋以下兵事災異可書者有二十餘事此皆脫見訂補

元至正辛卯徐壽輝與麻城人鄒普勝等以妖術聚眾反以紅巾為號

壽輝別號真一本縣人首陷蘄水縣

及黃州以蘄水為都國號天完僭稱皇帝改元治平以鄒普勝為太師掠江漢而窺全淮勢甚猖獗庚子五月為偽將陳友諒所殺

○按此太畧其本末見訂補

本朝成化己亥信陽軍聚眾為盜

弘治乙卯固始人董宦僭號天王聚眾入寇

○此另有考見訂補

正德己巳大饑

正德辛未流賊顧子鎮趙風子徐彥明等深入羅田

流賊皆西北人劉六劉七之黨也由兗豫歷荆楚深入羅田劫掠民逃深山縣治如洗張正福

統弟姪追之殺顧子鎮等八人餘賊敗走

○按徐乃齊訛見訂補

災異志

卷七

正德壬申流賊李勝二等六百餘人深入羅田

先是報書至官民逃竄未幾賊盤据城內民居月餘郤總兵統兵追及乘夜賊方醉臥盡殺之積尸數屋流血

成川

○按此書事二則誤合賊二股為一股又訛賊姓又誤將兩次事倒置辨見訂補

嘉靖戊戌大水

夏五月大雨彌月自新街波浪洶湧如山摧泛居民百餘家

嘉靖己亥冬十月盜張友讓友勇餘黨方大吉葉禿子等殺多雲鎮巡檢許昂

巡廡具疏

以聞即行本府委聶通判同祝縣尹集兵會勦掃剔巢穴民獲安寧

○按此書事不甚詳見訂補

嘉靖庚子大饑

○按此上四則天一閣本在脫去一葉中茲据蔡氏康熙前志災異沿用元文者按之恰合特行校補

祥瑞

○按此尚有宋政和產芝之類見訂補

乳生三子

奉泰鄉王氏歸本鄉李豪弘治己未五月初九日寅時生三子

瑞榴

正德庚午學諭衙赤榴數枝每枝九花俱結實一上八下尊卑有序是年庠生匡輔果中第九繼而多連登魁榜官於此者亦屢有陸擢蓋瑞氣之先見者也

瑞花

明倫堂庭植紫荆二株每當科期老幹花盛則登科在長嫩枝花盛則又在少屢試屢驗亦瑞氣之見於物類者今不存

論曰羅自國初以來水旱之數意不止此豐年之慶亦必多焉非如今所書之瑞之微也舊志不修故多失其傳惜哉後之繼今者幸即以時事而登之其毋使後人有無徵之嘆乎

羅田縣志卷之七終